

BAHAGIAN 1 : PEMBIAYAAN PENDIDIKAN PENERAJU TUNAS POTENSI

- A. PEMBIAYAAN PENDIDIKAN
- B. INSTITUSI PENGAJIAN TINGGI
- C. BIDANG TAJAAN
- D. TAJAAN KE LUAR NEGARA
- E. LAIN-LAIN

BAHAGIAN 2 : PERMOHONAN & SESI PENILAIAN DAN TEMUDUGA

- A. PERMOHONAN
- B. SESI PENILAIAN DAN TEMUDUGA
- C. ELAUN PERJALANAN
- D. KEPUTUSAN

BAHAGIAN 1 : PEMBIAYAAN PENDIDIKAN PENERAJU TUNAS POTENSI 6 (2017)

A. PEMBIAYAAN PENDIDIKAN

1. Apakah pembiayaan pendidikan Peneraju Tunas Potensi 6 (2017)?

Program ini merupakan satu program pembiayaan pendidikan untuk pelajar lepasan SPM/STPM 2016 yang berpotensi, berpendapatan isi rumah rendah dari latar belakang yang mencabar bagi mendapatkan pendidikan tertiar berkualiti.

Pembiayaan ini terbuka kepada pelajar yang berminat untuk menyambung pelajaran di peringkat pengajian asas dan ijazah sarjana muda (bagi lepasan SPM) / ijazah sarjana muda (bagi lepasan STPM) bagi kursus-kursus di Institusi Pengajian Tinggi Swasta (IPTS) seperti yang tersenarai di dalam 'SENARAI KURSUS, INSTITUSI DAN KELAYAKAN MINIMA'. Tawaran pembiayaan pendidikan Peneraju Tunas Potensi ini meliputi yuran akademik, yuran tempat tinggal, elaun buku, dan elaun sara hidup. Pelajar juga dikehendaki mengikuti program pemupukan dan pembangunan pelajar anjuran Yayasan Peneraju semasa cuti semester sepanjang tempoh pengajian.

Penempatan dan pendaftaran bagi kursus dan institusi pilihan pelajar yang berjaya mendapat pembiayaan pendidikan Peneraju Tunas Potensi akan diuruskan oleh pihak Yayasan Peneraju. Pelajar hanya perlu membuat pilihan pengajian yang diinginkan di dalam borang permohonan atas talian.

Nota : Pelajar yang memohon tajaan di Multimedia University (MMU) akan diberi peluang untuk mendapatkan tajaan dari Yayasan Telekom Malaysia (YTM). Elaun dari YTM turut termasuk elaun komputer.

2. Berapakah kadar pembiayaan pendidikan yang diperolehi oleh penerima Peneraju Tunas Potensi 6 (2017)?

Kadar pembiayaan pendidikan setiap pelajar berbeza mengikut bidang, tempoh dan tempat pengajian. Pelajar yang layak akan mendapat pembiayaan pendidikan yang merangkumi yuran akademik, elaun buku, elaun sara hidup dan program pemupukan dan pembangunan. Selain daripada itu, pembiayaan pendidikan ini turut menanggung tempat tinggal pelajar sepanjang tempoh pengajian di institusi masing-masing. Kadar pembiayaan pendidikan yang lebih lengkap akan dimaklumkan kepada pelajar dalam surat tawaran.

3. Apakah yang dimaksudkan dengan program pemupukan dan pembangunan pelajar?

Pembiayaan pendidikan Peneraju Tunas Potensi bukan berbentuk kewangan sahaja. Pelajar di bawah tajaan program Peneraju Tunas Potensi akan menjalani program pembangunan dan pemupukan pelajar. Program ini bertujuan untuk mempertingkatkan sahsiah diri, kemahiran komunikasi, dan menerapkan sifat-sifat kepimpinan dan daya saing dalam diri pelajar. Program ini diwajibkan kepada setiap penerima Peneraju Tunas Potensi dan akan diadakan pada cuti semester sepanjang tempoh pengajian.

4. Adakah pelajar di bawah tajaan Peneraju Tunas Potensi 6 (2017) dikehendaki berkhidmat dengan pihak Yayasan Peneraju selepas tamat tempoh pengajian?

Tidak. Para penerima pembiayaan pendidikan di bawah program Peneraju Tunas Potensi tidak diwajibkan untuk berkhidmat di Yayasan Peneraju Walau bagaimanapun, terdapat bon perkhidmatan di mana pelajar perlu berkhidmat di mana-mana organisasi atau syarikat berkaitan kerajaan (GLC), syarikat awam atau swasta yang berdaftar di Malaysia sebaik sahaja menyempurnakan kursus pengajian sekurang-kurangnya untuk 3-5 tahun.

Nota : Pelajar yang berjaya mendapat tajaan Yayasan Telekom Malaysia (YTM) akan mempunyai bon perkhidmatan dengan syarikat Telekom Malaysia (TM).

B. INSTITUSI PENGAJIAN TINGGI

1. Adakah pembiayaan pendidikan Peneraju Tunas Potensi 6 (2017) hanya menaja pelajar ke IPTS?

Ya, kerana penempatan dan bidang pengajian di Institusi Pengajian Tinggi Awam (IPTA) adalah tidak tertakluk dalam program ini. Bagi pembiayaan pendidikan Peneraju Tunas Potensi, Yayasan Peneraju akan menentukan bidang pengajian, kos dan penempatan yang sesuai berdasarkan profil calon yang dinilai semasa temuduga.

2. Bolehkan saya memohon pembiayaan pendidikan Peneraju Tunas Potensi 6 (2017) untuk belajar di Institusi Pengajian Tinggi Awam (IPTA)?

Hanya calon Orang Kurang Upaya (OKU) dari segi pendengaran dan penglihatan STPM 2016 sahaja yang boleh memohon pembiayaan pendidikan untuk belajar di IPTA. Calon perlu memohon sendiri penempatan di IPTA melalui UPU dan Yayasan Peneraju boleh mempertimbangkan penajaan di IPTA sekiranya calon mendapat tawaran ke IPTA melalui UPU.

3. Adakah saya perlu membuat permohonan sendiri di Institusi Pengajian Tinggi Swasta (IPTS)?

Tidak. Pihak Yayasan Peneraju akan membuat penempatan bagi pelajar-pelajar yang berjaya menerima tajaan pembiayaan pendidikan Peneraju Tunas Potensi.

Bagi calon yang berminat untuk menyambung pengajian di Cyberjaya University College of Medical Science, International Medical University dan Universiti Teknologi Petronas, calon perlu melepasi ujian kelayakan/sesi temuduga yang ditetapkan oleh pihak universiti sebelum mendapat tawaran penempatan. Pihak Yayasan Peneraju akan menguruskan sesi ujian kelayakan/sesi temuduga pelajar dengan institusi terbabit. Pelajar hanya perlu menghadiri ujian kelayakan/sesi temuduga di institusi terbabit apabila dimaklumkan oleh pihak institusi/Yayasan Peneraju.

4. Adakah saya perlu mendapat tawaran dari IPTS untuk memohon pembiayaan pendidikan Peneraju Tunas Potensi 6 (2017)?

Tidak. Bagi pelajar yang berjaya mendapat pembiayaan pendidikan Peneraju Tunas Potensi, pihak Yayasan Peneraju akan menguruskan pendaftaran dan penempatan pelajar di IPTS.

5. Saya telah mendapat tawaran untuk belajar di salah satu Institusi Pengajian Tinggi di dalam / luar negara, bolehkah pihak Yayasan Peneraju menaja pengajian saya?

Tidak. Penempatan pelajar di Institusi Pengajian Tinggi tempatan dan luar negara akan ditetapkan oleh pihak Yayasan Peneraju berdasarkan keputusan akademik pelajar dan profil pelajar yang dinilai semasa temuduga.

6. Saya telah menyambung pengajian di IPTS (peringkat asas), bolehkah Yayasan Peneraju menaja saya?

Boleh sekiranya kursus dan institusi pengajian calon ada tersenarai di dalam senarai kursus tajaan Yayasan Peneraju. Walau bagaimanapun, pihak Yayasan Peneraju perlu menilai profil dan keputusan calon sebelum membuat keputusan. Penajaan hanya bermula selepas tarikh surat tawaran dikeluarkan daripada Yayasan Peneraju kepada calon.

C. BIDANG TAJAAN

1. Apakah bidang-bidang pengajian di bawah pembiayaan pendidikan Peneraju Tunas Potensi 6 (2017)?

Sains Kesihatan, Kejuruteraan, Sains Sosial, Perniagaan dan Pengurusan, Kewangan dan Perbankan, Teknologi, Servis, Pendidikan, dan Komunikasi.

2. Adakah pembiayaan pendidikan Peneraju Tunas Potensi menaja pengajian perubatan / pergigian / undang-undang / seni bina?

Tidak.

3. Apakah bidang yang ditaja oleh Yayasan Peneraju bagi pelajar pengajian persediaan ke luar negara selepas tamat A-Level?

Secara umum, kejuruteraan, sains kesihatan (tidak termasuk perubatan dan pergigian) dan ekonomi. Kursus ijazah sarjana muda pilihan pelajar mesti ditawarkan oleh 50 universiti-universiti teratas di dalam senarai QS World University Ranking sahaja.

D. TAJAAN KE LUAR NEGARA

1. Adakah pembiayaan pendidikan Peneraju Tunas Potensi 6 (2017) menaja pelajar untuk belajar di luar negara?

Ya. Pihak Yayasan Peneraju turut menaja calon lepasan SPM yang layak (memperolehi sekurang-kurangnya 8 A) untuk program persediaan ke luar negara (A-Level).

Walaupun bagaimanapun, tajaan untuk belajar di luar negara adalah tertakluk kepada pelajar memperoleh tawaran tidak bersyarat di salah sebuah 50 universiti teratas di dunia mengikut QS World University Ranking selepas menamatkan pengajian A Level dan mendapat keputusan akademik yang cemerlang sepanjang tempoh pengajian A Level.

Pelajar yang tidak melepasi syarat kelayakan untuk menyambung pengajian di luar negara selepas menamatkan kursus persediaan akan menyambung pengajian di dalam Negara mengikut kursus yang ditetapkan oleh Yayasan Peneraju.

E. LAIN-LAIN

1. Adakah pembiayaan pendidikan Peneraju Tunas Potensi 6 (2017) terbuka kepada pelajar lepasan STAM?

Tidak. Pihak Yayasan Peneraju tidak mempunyai kursus yang bersesuaian untuk pelajar lepasan STAM.

A. PERMOHONAN

1. Apakah yang dimaksudkan dengan Surat Testimoni Sekolah / Letter of Recommendation?

Surat Testimoni Sekolah merupakan sijil / surat akaun ringkasan mengenai pelajar, aktiviti kokurikulum dan ulasan oleh pengetua/cikgu mengenai pelajar. Dokumen ini wajib (jika ada) - jika sekolah ada dan telah mengeluarkan dokumen tersebut sahaja.

Letter of Recommendation merupakan surat sokongan dari pihak sekolah yang menjelaskan kenapa pihak sekolah menyokong permohonan pelajar untuk diberi peluang mendapat tawaran pembiayaan pendidikan Peneraju Tunas Potensi. Surat boleh ditulis di dalam Bahasa Melayu / Inggeris. WAJIB bagi pemohon kursus persediaan ke luar negara sahaja.

2. Saya telah memohon menggunakan keputusan percubaan SPM/STPM. Bolehkah saya cuba memohon sekali lagi menggunakan keputusan SPM/STPM yang sebenar (sekiranya permohonan menggunakan keputusan percubaan tidak terpilih)?

Pelajar hanya boleh memohon sekali sahaja.

B. SESI PENILAIAN DAN TEMUDUGA

1. Adakah saya perlu membawa alat tulis?

Ya. Anda hanya perlu membawa sekurang-kurangnya sebatang pen menulis esei.

2. Apakah dokumen yang perlu dibawa semasa Sesi Penilaian dan Temuduga?

Dokumen yang perlu dibawa semasa sesi penilaian dan temuduga terdiri daripada:

- **Dokumen pemohon** (kad pengenalan, sijil surat beranak, salinan maklumat akaun yang aktif)
- **Dokumen ibubapa/penjaga** (kad pengenalan, sijil surat beranak, slip gaji/pencen/borang pengesahan pendapatan & 3 bulan penyata akaun bank yang aktif)
- **Dokumen adik-beradik** (kad pengenalan, sijil surat beranak & pengesahan pendapatan bagi mereka yang telah bekerja)
- **Akademik** (Salinan Slip/Transkrip Keputusan percubaan & sebenar SPM/STPM 2016, Salinan Keputusan Akademik Tingkatan 4 & 5, Salinan Sijil Berhenti Sekolah, Salinan Sijil Ko-kurikulum & Letter of Recommendation dari pihak sekolah bagi calon ke luar Negara)
- **Lain-lain** (Salinan Sijil Kematian / Cerai, Salinan Kad OKU & Salinan Surat Pengesahan Doktor bagi penyakit kronik).

3. Apakah tentatif program semasa Sesi Penilaian dan Temuduga?

Sesi penilaian dan temuduga ujian Bahasa Inggeris dan temuduga mengenai diri anda.

4. Adakah Ibu Bapa saya boleh hadir ke Sesi Penilaian dan Temuduga?

Hanya salah seorang ibu atau bapa / seorang penjaga sahaja digalakkan untuk hadir ke sesi penilaian dan temuduga sekiranya ibu atau bapa / penjaga anda berminat untuk turut serta mendengar taklimat daripada Yayasan Peneraju kepada pelajar kerana ruang menunggu adalah terhad. Kehadiran ibu bapa / penjaga adalah TIDAK WAJIB.

5. Pakaian semasa Sesi Penilaian dan Temuduga?

Calon dikehendaki untuk berpakaian formal dan sopan.

Lelaki - Seluar panjang dan baju kemeja.

Perempuan – Baju kurung / Blouse dan seluar atau skirt panjang.

6. Bolehkah saya menangguhkan Sesi Penilaian dan Temuduga?

Penangguhan tertakluk kepada budi bicara Yayasan Peneraju. Calon dikehendaki menghantar email dengan format surat rasmi dengan menyatakan sebab-sebab penangguhan. Tempat penilaian dan temuduga adalah ditetapkan oleh pihak Yayasan Peneraju.

7. Adakah saya dibenarkan untuk menukar kursus dan institusi pilihan saya semasa Sesi Penilaian dan Temuduga?

Ya, boleh. Dengan syarat anda memenuhi syarat kelayakan dan membuat pilihan daripada senarai kursus dan institusi di bawah tajaan Yayasan Peneraju sahaja.

8. Saya kurang faham mengenai 3 Bulan Penyata Akaun Bank yang Aktif?

Sila pergi ke cawangan bank yang terdekat untuk memohon penyata akaun bank (yang aktif – sedang digunakan) atau sekiranya ibu bapa anda mempunyai kad ATM, anda boleh mencetak penyata ringkas melalui ATM. Atau anda boleh membuat salinan buku akaun ibu bapa anda (yang telah dikemaskini).

9. Ibu / Bapa / Ibu dan Bapa saya tidak mempunyai sijil kelahiran kerana telah hilang / rosak. Apakah yang harus saya lakukan?

Sekiranya Ibu / Bapa anda tidak mempunyai sijil kelahiran kerana telah hilang / rosak, Ibu / Bapa anda boleh mendapatkan salinan baru atau membuat cabutan di Jabatan Pendaftaran Negara yang terdekat.

11. Saya tidak dapat menyediakan dokumen yang diminta oleh pihak Yayasan Peneraju, apa yang perlu saya lakukan?

Sila sediakan surat / nota makluman kepada pegawai Yayasan Peneraju mengenai sebab-sebab anda tidak dapat menghantar dokumen yang telah diminta.

C. ELAUN PERJALANAN

1. Apakah yang dimaksudkan dengan elaun perjalanan?

Pihak Yayasan Peneraju menyediakan elaun perjalanan kepada calon yang disenarai pendek untuk ke sesi penilaian dan temuduga pembiayaan pendidikan Tunas Potensi. Elaun perjalanan akan diberikan berdasarkan jarak tempat tinggal calon ke lokasi sesi Penilaian dan Temuduga yang melebihi 50 km. Kadar elaun perjalanan hanya merangkumi perjalanan darat dan air untuk calon sahaja.

2. Berapakah kadar elaun perjalanan yang diberikan?

Kadar elaun berbeza mengikut lokasi.

3. Bilakah saya akan mendapat elaun perjalanan tersebut?

Elaun perjalanan akan dimasukkan ke dalam akaun bank calon dalam jangka masa 2 bulan selepas sesi Penilaian dan Temuduga.

D. KEPUTUSAN PEMBIAYAAN PENDIDIKAN TUNAS POTENSI

1. Bilakah keputusan calon yang berjaya mendapat pembiayaan pendidikan Peneraju Tunas Potensi 6 (2017) akan diumumkan?

Calon yang berjaya mendapat pembiayaan pendidikan Tunas Potensi akan dimaklumkan secara berperingkat bermula pada hujung bulan March sehingga awal bulan Julai.

2. Bagaimanakah calon yang berjaya mendapat pembiayaan pendidikan Peneraju Tunas Potensi 6 (2017) akan dimaklumkan?

Calon yang berjaya akan dimaklumkan melalui panggilan telefon dan email.

3. Bolehkah saya membuat rayuan?

Tidak. Keputusan pihak Yayasan Peneraju adalah muktamad.